


祭輓彙錄卷三

祭文

維

康熙五十五年歲次丙申四月庚寅朔
越三日壬辰鎮守江寧等處地方將軍世襲阿達哈哈番加
三級眷友生鄂克蓀謹以剛鬣柔毛香楮庶羞之
儀致祭於

皇清誥封光祿大夫內閣中書加十二級景原項年翁
之靈曰嗚呼人之生榮而死哀也難矣孰有如我
翁者乎愚以宦遊江寧與翁識荆門牆交好有年
真不愧金石益友也以是知之切悉之深嗚呼人



世電光泡影生寄死歸惟無關於人心風俗生不
如死也是故有可死有不可死不可死者倏然長
逝則不能無餘痛矣嗚呼哀哉翁竟倏然長逝耶
翁徽郡巨族生而穎異才智過人讀書一目成誦
落筆頃刻千言孝弟忠信樂善不倦克勤克儉以
成家道弱冠蜚聲令聞赫奕德行經營裕民裕國
天子時巡召對維勤且爲人慷慨樂施恤人之危濟人
之困里族知交有寒無襦者飢無食者貧無以爲
家者皆以翁爲歸周給無算俾獲安全解衣推食
撫恤備至其立身也介而和其待人也溫而厲其
訓子孫也以讀書爲事敦古道去浮夸尚節儉專

務本業爲兢兢且生平嗜古無不得力於經史立
身行已應事接物何一不關人心風化之大而可
以死耶今逾古稀期頤可致尚有典型也乃哲人
其萎梁木其頽能無餘慟乎哉雖然翁之於世觀
化也所以遺其子若孫者令德也令名也有盡者
形骸之幻化而不朽者直與雲漢並燦日月並行
山岳並峙又奚憾於長逝也耶况桂子蘭孫金昆
玉季纍纍而若若者將翺將翔驥首

皇途大繼述之光者正未有已也翁其含笑於九京矣
爰酌清醕誄詞用陳友誼久切識我牆門倏聞逝
溘斯諤斯驚肅將芹奠以格幽魂敬申鄙悃非敢

曰馨靈乎昭昭鑒茲微忱嗚呼哀哉尚
饗

維

康熙五十五年歲次丙申孟夏宜祭之辰鎮守陝
西延綏等處地方掛印總兵左都督加六級李耀
協鎮陝西甘肅永固城等處地方兼轄甘州洪高
宣天馬等營路副將許仕隆延安營參將張之海
宜君營參將楊廷柱延綏鎮標中軍中營遊擊張
益左營遊擊楊生直右營遊擊趙達肅州鎮標中
軍中營遊擊紀廷樞延綏城守都司曹英延安營
中軍守備杜成德宜君營中軍守備張賓立綏德
州城守備王忠孝常樂堡守備趙虎雙山堡守備
褚廷壽建安堡守備余跳高家堡守備陳弘聖大

柏油堡守備王永威鎮羌堡守備郝瑞緒永興堡
守備楊進雙孤山堡守備周明清神木營把總王
瑞黃甫營把總閔心付木瓜園把總任道禮等謹
以辦香束帛清酌庶饌之儀致祭於

皇清誥封光祿大夫內閣中書加十二級景翁項太老
先生之靈而言曰嗚呼德星隕而風雲變色兮河
嶽黯淡而淒涼荆山摧而球琳毀裂兮瑾瑜含輝
而韞藏惟儀型之足法兮雖物化而何傷矧哲人
之其萎兮固令範之難忘緬我公之系出姬周兮
歷漢晉唐宋而世德其昌頡頏紫陽兮傳祖孫父
子而甲第相望二十四葉而篤生人傑兮標異凡

常一十五齡而騰聲鬢序兮器重珪璋宜麟驥兮
必騰驤維雞藿兮殷逮嘗充甘旨兮孝無方棄帖
括兮士而商隱漁鹽而籌轉運兮江湖廟廊傾宇
海而爭締結兮冰雪肝腸朝紳推重兮諮碩畫以
釐敷

君恩寵錫兮兼賜克食與

宸章葺宗祠而報本兮見遺像於羹牆築滌溪而造秀
兮置義田以贍荒濟貧周乏兮並經紀夫婚喪繼
絕扶危兮且陰抑夫豪強約己以儉兮作法於良
與人以寬兮宅心惟臧爰佑啓夫我後子舟楫棟
梁僉克承夫家學兮潘陸班揚或視草於黃扉兮

摛詞飛翰藻之香或分刺於巖疆兮敷仁懷蔽芾
之棠况多男接踵兮竚馮穎之鋒鏑孫蘭繞膝兮
皆謝樹之琳瑯伊仁人之多壽兮飲食遐康胡昊
天之不弔兮遽返仙鄉耀等夙附仲方之同舟兮
欽盛德之莫量驚聞訃音而揮涕兮悼賢哲之云
亡布哀忱而致奠兮歌薤露之悽愴神有知而來
格兮迴鶴馭之翱翔尚

饗

維

康熙五十五年歲次丙申南呂月戊子朔越宜祭
之辰 欽命督理江寧織造眷世弟曹頌謹以剛
鬣柔毛香帛之儀致祭於

皇清誥封光祿大夫內閣中書加十二級景翁項老世
臺之靈曰嗚呼太樸之真具洪濛兮渾淪之氣固
敦龐兮鬱而為瑞篤生公兮吉人藹藹如春溫兮
黃髮鮐背壽考終兮老成雖殞國之型兮推公之
系伊惟古兮功業文章播遼西兮厥嗣孔阜誰式
廓兮世居新都縣瓜瓞兮公也其後振繩誥兮英
年奮學同川受兮聲名鬱起無比肩兮海內名流

咸願交兮車輿滿戶履盈堂兮居已謙和待物誠
兮行不擇名處中節兮卹貧濟困無物色兮然諾
黃金不踰起兮世人仰之如喬岳兮家庭雍穆推
孝友兮荀龍謝鳳稱玉樹兮箕裘克荷名上達兮
舟楫霖雨濟蒼生兮扶鳩含飴樂無涯兮何期南
箕倏歛鍰兮羲暉汜駕白露沈兮彩雲西墜鶴唳
空兮江波秋杪楓灑血兮奚不百年竟長夜兮悄
兮寂兮恍兮忽兮溘焉留餘還造化兮公雖淹逝
有遺澤兮惟德不忘可無夢兮享茲大年不為歿
兮

鳳誥龍章貫滿門兮子孫羅列浸昌熾兮履順來兮履

順往兮顧茲總幃酌椒漿兮公其有靈鑒予忱兮
嗚呼尚

饗

維

康熙五十五年歲次丙申夏四月庚寅朔越三日
壬辰 欽差監督揚州鈔關內務府員外郎加三
級眷弟穆爾弘同差鴻臚寺鳴贊賈色禮謹以辦
香束帛清酌庶饗之儀致祭於

皇清誥封光祿大夫內閣中書加十二級景原項老親
臺之靈而言曰嗚呼天下無所倚庇之人可以一
日不生天下群相推重之人斷不可一日而死者
夫我翁豈非生有足重死有可哀當代奉為矜式
奕世傳為模範者乎胡天不弔一旦溘然長逝能
不悲哉能不悲哉翁賦姿英敏秉性端肅默識好

學武林就傅即語驚塾師及長挾所學以交遊海
內一時名公鉅卿咸交口稱翁之賢且才不置繼
而業鹺淮揚運籌策畫遇事果敢歷五十年隨意
詢諏條分縷析其間有補於鹽政者殆不知凡幾
恭逢

聖駕南巡翁以老成持重為同輩首推應答詳明頗獲
賜賚弟等躬膺

簡命初莅茲權即耳我翁之碩德懿行推解以應親朋
喪祭冠婚緩急周宗黨兼之篤意本源敦誼睦族
遇有不力靡不成全會歲祲穀價珠貴鄉人乏食
翁乃法古人救荒贍傭亟作新祠以食眾至於御

下以寬待人以恕施惠予德而不望報忘怨釋忿
而不與爭種種輕財好義之事未可枚舉胡天不
祐竟致不起能不悲哉雖然翁年七十有三已踰
古稀之壽令子四人皆列名鶴序文孫繩繩振振
蘭躋瑤階行將高大其門朱丹其轂翁享人間之
福不為不備食上蒼之報不為不隆矣惟是素仰
儀型忽焉遽逝柩椁在御哲人云亡欲求復觀音
容杳不可得矣能不悲哉茲當宜祭之辰敢具溪
毛之獻翁靈不昧來格來歆尚

饗

維

康熙五十有五年歲次丙申四月癸巳庚寅朔越
 宜祀之辰直隸巡道管理通省刑名驛傳按察司
 副使加三級徐炯大理寺少卿加二級陸經遠掌
 京畿道事湖廣道監察御史加一級徐樹庸河南
 彰德府安陽縣知縣加二級紀錄四次徐樹敏工
 部營繕清吏司員外郎 欽差兩窰廠監督今陞
 刑部廣西清吏司郎中徐樹屏候選知縣徐樹閱
 戶部湖廣清吏司郎中加二級徐涵謹以辦香束
 帛之儀致祭於

皇清誥封光祿大夫內閣中書加十二級景翁項老世

臺太老先生之靈曰嗚呼瓜步風淒海門月落赤
松一去名山升辟穀之仙黃鶴雙飛寰海失掄輪
之望引壺觴於洛下空傳勝事千秋溯耆舊於襄
陽倍切遙情萬里集大禽而會葬緬宿草以興哀
能不傷心敢忘志誅太老先生熊湘華胄歛水名
流石室珠簾地是真靈之府錦城花谷舊稱通德
之鄉代有聞人自晉司馬而桐廬卜築世傳隱德
至唐聘君而龍尾移家朱紫陽登第之年弘開瑞
牘家牧公遷鶯之后大啓高門太老先生則氣稟
金精久露星垣之芒角夢探玉策早占國老之尊
榮賦質本乎神奇績學加之慧定下帷講誦三年

曾不窺園抱膝伊唔繞舍居然漂麥蜚聲文帖試
輒冠其一軍馳譽名場望久騰於通國爾乃性成
純孝念切承歡謀堂上之旨甘治生是急挾江南
之齏策富國兼籌於是泛宅邗江僦居隋苑一編
管筴聊展餘緒於才人五色采衣喜奉雙鳩而養
志始也孝子之臚牒洗腆極盡其誠既而鮮民之
祥練虞禫動遵乎禮然而襟懷冲澹不矜煮海之
竒詩酒流連時挹平山之勝提躬則履仁而蹈義
裕後乃移孝以作忠長君中翰公華年通籍紗籠
丞相之名次君觀察公劇郡登庸圭析藩侯之任
懸魚載石並承趨鯉之家風紫誥金泥壘奉展親

之

國典以及車中文度盡是人豪膝下季方胥成寶器汾
陽之曾元輩時垂手而遺其名右軍之內外孫或
含飴而割其味颺其清德固蠡測以難勝頌厥詒
謀洵管窺而莫罄至若范希文之睦族王彥方之
居鄉周公瑾之締交魯仲連之排難鄉評最著士
論尤推故知魯國申公耆儒斯在江東卓茂碩果
猶存今時持杖將車太史占星於珂里他日扶輿
加璧官人勸駕於珠湖樹德維滋知植根之孔固
凝麻未艾翼食報之方長夫何厄閨黃楊神遊碧
落蓉城有主石曼卿身是真仙華表無蹤丁令威

鶴歸何日炯等紀羣交契孔李情深感誓墓於王
哀蓼莪輟誦恨吹笙於緱氏箕尾難攀回首竹林
悼黃墟之闕若攬芳沼吐痛魯酒之空陳謹攄哀
悃以通誠仰冀靈修之來格尚

饗

維

康熙五十五年歲次丙申五月庚申朔越宜祭日
管理直隸刑名兼理驛傳事務巡道副使加三級
期徐炯率男戶部湖廣司郎中涵副榜貢生德淳
舉人修仁謹以瓣香束帛之儀致祭於

皇清誥封光祿大夫內閣中書加十二級景翁項老年
臺先生之靈曰嗚呼人生斯世如遠行客弱草棲
塵白駒馳隙固今與昔之同悲兮豈賢與愚之一
律苟上有以振前規兮下有以啓後則斯生無愧
於所生兮將身歿而名不歿以予觀於公之行履
子寧非曠世之豪傑遡翁之先系出自姬或弱齡

而服聖或標格以過詩中避地而入蜀兮粵再遷
而宅歛溪旣簪組之林總兮彌種德以培滋唯址
厚而源長兮乃篤生吾翁以振之當翁之生家道
中落踵詩書之世澤兮擅英才之卓犖爰執經而
問業兮資賢師友之商榷旣造詣之斐然兮悟療
貧之非策遂改業以持籌兮羌埋踪於市宅卒發
身以成名兮慶家門之式廓迨鴻業之旣成子因
素志之丕展旣甘臙以承歡兮亦泉壤之光顯新
宮並故廟而聳峙兮手澤共畫像而幽闡商黌宮
之鼎新兮謀譜牒之重撰更石堤之修築以克固
子俾子姓咸載胥之得免凡若此者孰非仁澤之

攸施而總歸乎繼述之盡善况後起之多英子業
驅馳於王路果竭忠以報

國恩兮何患家聲不日勝其故吾知繼繼承承而不墜
兮使吾翁之德業永永傳美於無度昔我先公道
廣情豪嘗物色夫英彥勿計山林與城市必擇其
尤者而訂雲霞之交旣與翁水乳交合子愚兄弟
用仍世好盖往來無間而翁果無負乎久要憶歸
田之十載頻渡江以招邀迄卯秋之北上亦永夕
而永朝宛笑言之如昨兼慰問之匪遥何惡音之
忽至情颯颯兮淚瀟瀟嗚呼燕山邗水雲樹迷蒙
一官遙寄憑弔奚從遣一介子將束帛陳些辭兮

寫寸衷靈其來格飄然乘風嗚呼哀哉尚
饗

維

康熙五十五年歲次丙申五月庚申朔越宜祀之
辰江南安徽寧池太廬鳳滁和廣等處提刑按察
使加三級軍功紀錄一次年家眷世弟朱作鼎謹
以剛鬣柔毛清酌庶饗之儀致祭於

皇清誥封光祿大夫內閣中書加十二級景原項公之
靈而言曰嗚呼莊周著論其生若浮史佚有言沒
而不朽是知人之死生固無足異而惟盛德事業
為足傳諸不朽也若公真沒而不朽者哉公系出
姬周遥遥華胄始祖隱居歙南歷傳數十世科第
蟬聯蔚為閥族公少負俊才縱橫藝苑試輒奪弧

取功名不難拾芥而公意在孝養恬澹仕進謝帖
括而容維揚從事齟策夫亦少伯功成而有陶朱
之號聖門高弟不嫌貨殖之名古之賢傑多有託
此以展其經理之才乎我

國家財貢所出鹽筴與田賦並重一切軍國之需實有
賴焉侍御使暨齟使經猷於上必藉諸綱之有才
智者相與勦理於下始能國賦裕而引無壅滯昔
我先伯祖奉

命建節維揚知之最爲稔悉公負倜儻才凡齟政因革
利益瞭若指掌洞如觀火先後侍御及秉齟節者
無不諮詢投契奉爲指南是公雖未得措施廊廟

以大展經綸而其運籌規畫以裕軍國者無一非
公之事業宜乎

翠華南蒞特沛殊恩公以老成知體得覲
天顏而邀

御書克食之賜極人生之曠典也若夫公之懿行彰彰
在人耳目間凡所交知無不詳悉有指不勝屈固
所謂盛德之士也夫德盛者天恒錫之以福今玉
樹琳瑯逾河東之三鳳蘭孫琬琰等元凱而齊芳
後裔繩繩綿綿未艾兩君鵲起內而鳳閣宣綸名
高紫禁外而麟符奏最聲婉黃堂異日之贊樞機
而樹屏翰行且拭目俟之公也生享

紫誥之榮身被

湛恩之渥予階光祿直與鄴侯之宰相鄭氏之尚書等
公其真不朽者哉余以先伯祖建齋節故與公有
世雅辛卯歲余復奉通省郵齋之

命因得與公喬梓叙世講見公精神矍鑠少壯者不及
自必長享期頤壽臻人瑞今春謬沐

君恩進階觀察益邇公梓里方謂老成在望可奉典型
孰意鉅掩金刀訃音忽至也嗚呼緱嶺云遙不返
仙人之轡少微既掩誰回處士之星能無聞玉笛
而神悲望金臺而心悵乎爰爲楚些以招之曰哲
人委順不憾不惶歸全龍吉達化蒙莊天不憖遺

碩德云亡士女永嘆童叟悽愴我懷嘉行於言勿
忘感悼增惻視天茫茫乃陳雞絮乃奠椒漿靈其
有知來格來享尚

饗

維

康熙五十五年歲次丙申清和月庚寅朔越宜祀
之辰江南布政使司管理江安徽寧池太廬鳳淮
揚廣和滁徐兼巡池太地方督糧道按察使司副
使加三級紀錄二次年家弟王希舜謹以剛鬣柔
毛清酌庶羞之儀致祭於

皇清誥封光祿大夫內閣中書加十二級景翁項公之
靈曰嗚呼龍蛇厄歲兮麟鳳歿光靈椿萎秀兮德
曜潛芒慨典型之已喪兮徒見總帳之飄揚歎觀
效之無從兮不禁追念而淚浪維我公爲新安之
望族兮先世多簪笏之輝煌抱岐嶷之異質兮著

文采於鄉邦懷濟時之偉略兮為鹽筴之紀綱興
大利而除大弊兮多奇策之超常當事咸欽仰而
願為借箸兮

天子更錫賚而寵光事高堂而養志承歡兮篤宗誼而
修堤立倉其接物兮謙厚而和平其持已兮正直
而端方凡生平之美行兮未易枚舉而稱揚誕四
鳳而齊鳴兮俱盛世之珪璋或翱翔於內翰兮或
分符於名邦或以英才而膺明經兮竚超擢而飛
皇况諸孫更濟濟而倜儻兮俱屬瑤珥與琳琅公
宜膺夫上壽兮胡竟返旆於帝鄉希舜倏聞凶訃
兮不禁哀戚而徬徨敬遣使致奠於靈前兮惟冀

公神之來嘗尚

饗

維
康熙五十五年歲次丙申孟夏月庚寅朔越祭日
壬辰總理兩淮江廣河南等處鹽法道加一級紀
錄五次年家侍生張應詔謹以剛鬣柔毛清酌庶
饗之儀致祭於

皇清誥封光祿大夫內閣中書加十二級耐菴項年兄
之靈前曰嗚呼酈泉少驗菊井潛移崑崙玉掩邗
水風悲罷里春於夜相感薤露之晨晞揚楚些而
難返悵歸鶴以何期繫惟項君闕閱家聲蟬聯鳳
起和義名鄉歸善成里德旣高於滌溪慶彌衍於
歙水閱南宋以迄今益繩繩其未已君也少而穎

祭軒轅集卷三
異長而明聰鎔經鑄史默識心通珠璣腕底錦繡
胷中班楊枚馬異曲同工行展驥於千里佇破浪
於長風於時景愛椿護歡承菽水屈華國之弘儒
爲克家之令子做計然之遺蹤追少伯之芳規經
綸小試於長籌晨昏得備乎甘旨至若養旣匪薄
祭亦從豐雲封木蔭鬱鬱蔥蔥廟貌奕奕孝思無
窮營重貲而不惜惟獨力以成功加以賑卹周親
慈惠廣播兒無常父之衣巷有同功之火恃安堵
者千家起蒙袂於道左此誠利濟於斯人而存大
公於無我者也迺以淮南領袖瞻仰
天顏從容奏議甦困濟艱

宸翰煥彩珍味重頒老成碩畫譽重鸞班然而黃鶴非
有意於軒車爰居本無情於鐘鼓三徑異陶令之
荒五色課邵平之圃清尊綠酒聯雅會於月夕花
朝布韞芒屨寄幽情於琳宮梵宇惟陳太丘之風
規庶相頡頏於今古况乎祥凝瑞藹樂事家園舞
益三鳳之彩甘分兩世之孫壯旣炳蔚於豹變幼
將扶搖以鵬騫豈非昌以善積祉以類繁哉業已
童顏鶴髮羣思報東以長生無如弱水蓬萊遂爾
抗手於塵世雖古稀已踰其三而箕疇克鍾其四
何典型之云亡合鄉邦而殄瘁其誰不涕泗交頤
中心如醉乎噫余承乏之始值君養疴之秋未獲

望其眉宇定有裨於諮謀胡遺書之在几條音容
之不留惟蘭孫之繩武俾克紹乎箕裘冀靈爽其
未昧竚言返乎神州嗚呼哀哉尚

饗

維

康熙五十五年歲次丙申四月庚寅朔越二十六
日乙卯宜祭之辰署分巡淮揚等處地方兼理漕
務海防河道鹽法屯田事務江南提刑按察使司
候補府正堂加三級年家眷弟傅澤洪謹以瓣香
束帛清酌庶饗之儀致祭於

皇清誥封光祿大夫內閣中書加十二級景翁項老年
臺之靈而言曰嗚呼維翁挺生卓焉寡儔鴻才令
望天稟之優清姿華胄曰第一流粵稽得姓遠溯
姬周炎漢之際避地遐陬典午以來世德作求文
章科甲炳炳彪彪自歛再遷乃莅邗州翁幼穎異

從師以遊早覘犬器蔚爲琳球及夫弱冠藝苑旁
搜筆耕心織祕騁妍抽篝燈夜讀螢案蚊幃學業
旣就誰其能侔譬若庖丁目無全牛亦若東部名
噪柝榴老生宿儒咸讓一頭久之棄去載度載謀
上念垂白菽水是憂爰事齶策出入持籌怡怡色
養羊豕之羞世風寢下俗日益偷比屋而居幾爲
仇讎民多失德或以乾餼翁大不然加意噢咻敬
宗睦族施壘且稠石堤保障維龍在湫靈霖弗輟
魚鼈浮游翁廛未雨牖戶綢繆煌煌祠宇俎豆尊
卣鬱鬱墟墓檜柏松楸翁步念之材庀工鳩以礮
以奠以壘以髹闕者以具圮者以修曩哲邈矣我

思悠悠凡今之人能若茲不當代鉅公名埒韓歐
締交折節高言唱酬群相引重擬陳太丘珂里稅
駕日夕鳴騶

翠華南幸輝映旌旂翁之姓字上達

宸旒雍容奏對悉心宣猷

特典異數播厥千秋其他芳躅美不勝收滌溪璜壁前
蹟長留米顛坡老鐵畫銀鈎余昔守土札翰時投
辭吐侃侃善氣油油每懷素行宜迓天庥夫何不
弔遽歎浮漚忽忽星霄黯黯雲愁用酌卮酒以告
諸幽靈其不遠海上十洲來格匪遲庶幾少休鳴
呼尚

饗

維

康熙五十五年歲次丙申四月庚寅朔越宜祀之
辰署理江南蘇松常鎮糧儲道兼巡視漕河分守
蘇松地方事務鎮江府知府加五級紀錄十四次
年家眷弟陳士鏞謹以剛鬣柔毛清酌庶饗之儀
致祭於

皇清誥封光祿大夫內閣中書加十二級景翁太老先
生之靈曰嗚呼遡姬室之衍派兮暨喬居於蜀封
當有宋以榮顯兮歷浙水以亢宗復移宅於黃海
兮漸門第之履豐公實產於德門兮毓靈秀於厥
躬當齟齬以俊偉兮富文史於三冬挾計范之籌

策兮向維場而隸籍觀盈虛而懋遷兮嫺醜務而
稔悉交名公與鉅卿兮日車馬之絡繹多士善而
登龍兮每開閣而揖客修甘旨以孝養兮奉高堂
而愉色侍鶴髮以慎終兮爰卜兆以窀穸啓地靈
之禎祥兮我佳城之鬱鬱兼友愛於同氣兮棣萼
相輝於春日江浙推為山斗兮聲氣遍乎寰域會
翠華之南蒞兮陳利弊以愷切將裕國而恤商兮

天顏聞而喜悅

錫御廚之珍饈兮盛遇實為殊絕更石麟之誕異兮喜
雛鳳之翩翩擬謝樹與竇桂兮猗歟璧合而珠聯
長公橐筆於薇省兮詠翻階之紅藥代

綸綍以宣麻兮郎署洊含夫雞舌更次君之早貴兮著
循譽於隴西服獬繡以升華兮看豹轂之榮馳承
封章之稠疊兮晉柱國之崇階顯太母於八座兮受一
品之笄珈更累代之邀寵兮荷

贈典而有加公乃宴樂於林廬兮蒔花藥而蔭梧竹集
鄉閭之耆英兮共情話以命酌惟榆景之可樂兮
可坐躋夫百年何赤虬之無情兮乃遽引夫雲帡
御罡風以逍遙兮吸沆瀣以容與劔已起於延津
兮琴徒懸於繡柱傷杜牧之駒書兮感長沙之鵬
賦吟楚些以難窮兮續蒿里與薤露幸哲嗣之繼
起兮覩鸞鷟之蜚英建謨猷於巖廊兮用顯揚夫

所生况孫枝之林立兮會騫騰於上苑羨高門之
有兆兮著偉績而彌爛公曷不為少留兮竟溘然
而長往墜當世之儀範兮失群倫之瞻仰曠風景
夫隆譽兮仰鄰邦之大賢聞典型之奄謝兮實中
心之愴然奠束帛以作誄兮冀昭格乎几筵尚
饗

維

康熙五十五年歲次丙申清和月庚寅朔越宜祀
之辰督理湖廣湖北驛傳兼理清軍鹽法道按察
使司副使加三級年家眷弟楊懋紹率姪原任直
隸古北口等處地方總兵官世襲阿達哈哈番鑄
男乙未科進士錡廣西柳州府象州知州以牧謹
以剛鬣柔毛清酌庶饜之儀致祭於

皇清誥封光祿大夫內閣中書加十二級景翁項老年
臺之靈曰嗚呼世固有以一身之行而於崇祖敬
宗入孝出弟贍族信友諸大端一一其無愧者故
其生也為可敬而其歿也為可矜緬維公之先世

流輝積厚葉簪纓惟公之嘉言懿行克績夫箕
裘而光大乎前人公秉姿穎異幼而岐嶷迨乎長
而好學則博稽墳索兼綜古今襟期式玉藻采敲
金宜其文名籍籍輒累試而冠軍嗟乎以公之文
章行誼而使得當大位展布其所欲爲則功可加
於宇宙言可券於當今詎意公當家業之偶落乃
不以揣摩廢治生而坐缺供養於雙親是以左右
就養甘脆畢具靡不先意以將迎又其天性友愛
其於從昆十人事事悉爲殫心奚翅姜肱之同一
被田氏之合三荆計公遷於維揚凡幾歷年所而
家業乃益盈公則以孝友而上推乎宗祖也自始

祖以下皆以次修築乎先塋嘗聞公之宗祠捐家
貲以建造歷二十餘年而告成一旦圯敗則復修
甚費經營公則購巨木築大堤歷十年而廟貌重
新其或族黨中有貧寒不振者公則倣范文正之
遺法置義田以廣爲調急而厚資乎賢能至其交
友以誠也仁恩媿乎脫驂然諾比於掛劍凡遇大
事悉爲排難而解紛以故公之志行獲賞識於名
公巨卿而一見即歡若生平公又嘗思卹民以甦
商而具本以叩陳蒙

天顏之有喜特頒賜

御書沐寵眷之殊恩其他敦厚故舊獎進後生則事事

述之而不勝宜其倍膺上天之眷佑克享百歲之遐齡奈何倏然長逝乘黃鶴而遷乎蓬萊山島之濱痛老成之彫謝嗟典型之無存噫嘻惟公之令子若孫振振繩繩名登仕籍克相繼而大建厥勲竊意公雖死而猶生然而望公之宇不聞公之道遙而容與登公之堂不聞公之慷慨而激昂入公之門不聞公之退讓而逡巡紹也忝屬締交素與公相契之深而能無敬陳一詞告哀於公之靈嗚呼尚饗

祭輓彙錄卷三

祭輓彙錄卷四

祭文

維

康熙五十有五年歲在丙申四月庚寅朔越中浣祭日甲辰江西按察使司分巡饒九南道副使加一級年家眷世弟龔嶸謹以剛鬣柔毛清酌庶羞之儀致祭於

皇清誥封光祿大夫內閣中書加十二級景翁項老年世臺先生之靈曰嗚呼惟翁之碩德兮洵積厚而流光宜後嗣之亢宗兮咸鵲起而騰驤善靡隱而不著兮躬克享天崇報之輝煌溯閱於世胄兮

實黥山靈兮之鍾祥少醞釀夫經籍兮早樹幟於
文場既乃棄章句而謀甘旨兮挾齏策於維揚業
隆隆其日起兮遂克表乎淮右之重望伊冠蓋之
駢轡兮交騰譽於四方為當途所推任兮加禮遇
於殊常維

鑾輿之問俗兮隨警蹕兮趨蹌沐

宸翰之寵錫兮叨尚食之芬芳誠曠典之恭逢兮衆益
占夫慶澤之彌長他若孝友著於閭閻兮更敦宗
恤族之皇皇樂行仁而靡倦兮植世德其毋忘挺
詰嗣以齊輝兮羣佩玉而鏗鏘或翔步於薇省兮
或宣績於巖疆或發軔初搏於九萬兮或勵志窮

覽於縹緗矧鶯遷其未艾兮方需次於文昌仰薦
繡之峩峩兮佇肅紀於嚴霜既碩彥之盈庭兮森
玉樹其成行膺

紫綉之榮宣兮臻期頤而未央何哲人之忽萎兮嗟梁
木之摧戕覩里門之罷春兮溯儀型而涕滂余夙
叨夫世講兮每結想於邗江綠匏繫於蠡湖兮弗
克躬奠夫椒漿願靈享之式憑兮用臨風而惻傷
嗚呼尚

饗

維

康熙五十五年歲次丙申夏四月庚寅朔越祭日
宜祀之辰分守濟東道兼理通省驛傳事務布政
司參政加七級年家眷弟申大成偕男瀛等謹以
辦香束帛清酌庶饗之儀致祭於

皇清誥封光祿大夫內閣中書加十二級景翁老先生
之靈曰嗚呼余自宦游以來奔走風塵鞅掌盡瘁
故鄉知交音問疎濶不獨離別之感時縈夢寐抑
且死生之戚路隔幽明每一興懷潸然泣下况夙
忝至好如我太翁先生有不聞訃而悲者乎余之
得交於太翁數十年矣太翁才本天授學有師承

少事文翰博通書史賦詩作字實超軼時流同學之士皆能取上第得高官而太翁獨以華國之才退而爲造家之計謂治生養親爲儒者急務安用伊唔咕嗶與世人競浮名哉以是業鹺兩淮家日隆起仰事俯畜靡不裕如自鹽法之敝日遷月改身其業者每以支給爲難而太翁運籌決策動中機宜當事咸相引重即四方賓客名公巨卿耳熟其名者亦靡不折節下交而太翁之聞譽遂滿於天下昔

聖天子南巡狩洞悉商困貸帑緩征仁恩疊沛亦由太翁率衆首事具疏陳請

至尊爲之改容

恩賜特厚比年來國課無虧商力稍裕孰不頌太翁之功哉至其天性純篤培固本根則修宗祠以隆其享祀求遺像以聚其精神築故址以新其堂構邀贈典以致其顯揚皆太翁之無忝所生也若其惠周族屬澤及三黨以至賑貧濟乏排難解紛潛德隱行尤未易更僕數而太翁則生膺榮封爵居極品長公次公或列官京師或分守外郡賢聲素著旣蔚爲國楨矣而群季俊秀孫枝繁衍德門之盛鄉里交口稱羨又不待余之縷而陳也獨惜余與太翁早年同事余回奉太翁爲典型太翁亦引余爲同

志十餘年來雲山間隔每切懷思去秋一過里門握手道故方謂太翁年逾古稀強健猶昔齒德俱優福壽殆未可量豈意相別僅半歲而訃音忽至也故舊之感哲人之萎能無愴然而出涕乎哉余以

王事馳驅未獲寢門一奠薄具生芻遙致瓣香惟太翁念疇昔之好欣然而來格焉嗚呼尚

饗

維

康熙五十五年歲次丙申夏五月庚申朔越二十八日丁亥宜祭之辰新陞四川分巡建昌上南道按察使司僉事加二級年家眷姪汪錫齡謹以剛鬣柔毛束帛瓣香清酌庶饗之儀致祭於

皇清誥封光祿大夫內閣中書加十二級景翁項老伯大人之靈而言曰嗚呼公竟翩然而長逝耶庚寅冬錫自粵西歸里旋即需補入都詣堦拜別於時公之精神正爾強健飲食正爾倍添歸而以告家君謂公古稀將近顧乃矍鑠如同少壯是必大有得乎頤養之道家君顧錫言曰夫世之知公者孰

有詳於余乎。余與公少同里長同業，以至籌畫鹽筴，又靡不時相聚首。則世之知公者，孰有詳於余乎？蓋公得於天賦者最優，而資乎頤養者大都不過十之一二耳。聞言之下，私計公必將由此而誕膺天眷，克享期頤。當不僅終於古稀而已。錫嘗從外吏索米長安，每接家郵，聞公康強如故，心竊喜之。前歲公即經士長兄抵都，錫即單騎馳詢。知公起居無恙，不復再為他及。今春錫邀

寵命持節西川，因省覲，心切假道，維揚初擬，庭除拜見。後即當一為面叩，以慰積懷。側聞左右謂公已溘然奄逝矣。嗚呼！公其無意於人世耶？抑後生小子

之不幸，而天奪之典型，將使自陷於聾盲耶？雖然，公今往矣。回念公之品望，孰與追攀公之才調，誰為可比？公之出言，人信見義必為，誰為得其大槩？是公一逝而老成之模範不幾乎其息也耶？所可幸者，諸郎君嗣武高風，銓曹待次，或含香於粉署，或持節於監司，光昭令德，焜耀里閭，公亦可欣然靡恨矣。錫齡叨同里末誼，等姪行慨，慕音徽，恒深靡及。潔采溪毛，用茲奠獻。嗚呼尚

饗

維
康熙五十五年歲次丙申四月庚寅朔越祭日壬
辰候補巡道加十級紀錄二次年家眷弟在制期
功張韜率男期天賜天錫謹以剛鬣柔毛清酌庶
饗之儀致祭於

皇清誥封光祿大夫內閣中書加十二級景翁項老年
親臺太先生之靈曰於戲惟公世濟明德天資異
才靈臺幽遠丹府弘開三篋多識卅乘兼該詩工
鮑謝賦善鄒枚纁帛之榮已尊為更老命秩之貴
高列於鼎台為人倫之圭臬作鄉國之杓魁旣峻
神鋒亦標英誠金出鑛而為銑劔在鐔而新淬君

子休休吉人訥藹疾雷破柱處之不驚冬日在人
即之可愛以神明爲用而心有璣衡以忼直爲懷
而心無芥蒂挾其籌策足號珠囊蘊其經綸還稱
玉海地惟黃岳山有紫陽喬木斯存幹彊枝茂醴
泉所滙源遠流長竭報祖之誠崇其祠宇篤亢宗
之誼贍以困倉築堰捍災保千家之廬舍開渠救
旱灌萬頃之稻秔復滌溪之講堂英髦向學葺歛
郡之文廟俎豆有光或踵事增華或經始創置莫
不區畫於盤錯之秋培植夫根本之地身旣備厥
姱修天用錫之善類衣冠甚偉公有綺皓之風堂
構相承子多公輔之器鳳池掌誥薦節宣猷仲華

拜袞王掾黑頭或明堂作棟或巨川濟舟叔季連
翩遙羽皆爲鸞鳳孫曾騰蹕騁轡總是驂騑而公
朱芾斯皇受

九重之錫命秀眉多壽享五福之箕疇方將訶酬桂父
袖挹浮丘何節宣之失次致疾疚之弗瘳竟乏西
山之藥遽爲東嶽之遊於戲哀哉韜也依仁嚮義
久奉儀型望宇對衡共申繾綣平時小別未免魂
銷永訣千秋寧無泪泣人琴已矣忍登子敬之牀
鄰篴淒然愁過山陽之館緬懿德於生平寫哀思
於簡翰冀有鑒於明靈庶尚歆夫薄奠嗚呼尚

饗

維

康熙五十五年歲次丙申四月庚寅朔越五口甲
午宜祭之辰中憲大夫知江南揚州府事年家眷
弟馮肅謹以辨香束帛清酌庶饁之儀致祭於

皇清誥封光祿大夫內閣中書加十二級景原項老年
翁先生之靈而言曰嗚呼維公名族肇自晉唐纓
紱相承源遠流長公從歙南來寓維揚冠蓋四集
酬接不遑聞風傾慕握手登堂遠邇傳播嘉名孔
彰公少力學文譽藉藉矯首青雲刷羽整翮為謀
甘旨始挾齶策精熟諳練洞悉因革周爰諮詢謀
無弗獲才不台於深用謙抑

翠華南幸駐蹕高皇公率同儕叩首上陳緩征發帑特

沛

恩綸商困獲蘇澤及無垠

宸翰用錫兼以羞珍遭遇曠典拜舞歡欣公性孝友天
倫是篤怡怡色養敬兄睦族義田群贍長堤高築
立祠修墓樹碣植木榱桷塋阡輝輝轟轟敦本之
行可風末俗愛茲朴素疾彼紛華維儉維勤以教
於家寄情詩酒秋月春花臨摹真艸筆法爭誇清
言疊疊舒英吐葩風流恬雅古人不遐濟美多賢
克昌厥後伯列清曹仲衣廡繡公邀

帝寵上爵用授

天誥煌煌腰懸紫綬百祿是荷宜躋上壽奄忽云殂梁
木傾覆肅持符出守來莅茲城知公長者一見心
傾胡弗憖遺留此典型聞訃驚悼空念儀形殽蔬
維潔酒醴維清靈其享之鑒此哀誠嗚呼尚

饗

維

康熙五十五年歲次丙申夏四月庚寅朔越祭日
庚子之辰江南徽州府知府加三級紀錄三次年
家弟郭晉熙謹以剛鬣柔毛清酌庶饗之儀致祭
於

皇清誥封光祿大夫內閣中書加十二級景翁項老年
臺先生之靈前而言曰嗚呼地坼天傾山頽溪涸
珠斗芒寒蒼穹氣薄邗江之水東咽歛浦之流西
落才瞻紫氣奚神理之茫然遽厄黃楊乃儀型之
闕若蕭蕭總帳感深閭里而歛歛謾謾松風訃告
鄉邦而震愕聲因激楚而不成管以哀傷而難著

祭軒輿金卷四
翳我公之德音徧海內而烜爍幼則著夫穎異長則勤乎問學呶唔咕嗶薄章句之儒不爲擘畫經營竭甘旨之奉足樂生也養志起居恒先意以承迎歿而藏形北域且示夢以咨度敦一氣之本根聯同堂之棣萼本支誼篤載笑載言戚屬情長或歌或嘏築石堤以防潰決贍傭工以濟藜藿宗祠負若既合饗而昭穆有倫塋域釐然復繪圖而界址可索厚族姓而義田斯給念先澤而滌溪加擴兩世之薦享有祠入廟而孝思肫篤累代之音容如在展軸而陸離斑駁此足徵公之志量弘深才能卓犖也旣而交遊徧乎四方聲聞徹乎京洛卓

卓乎老成之模範隆隆然

帝澤之優渥

天章賁錫奉爲家珍

天味寵頒飫以甘酪儕輩服其經濟當事資其才略長君駿發簪筆紫薇之省仲君挺生書績循良之卓秉義方之訓敦素絲而美羔裘守勤慎之箴佐密勿而戒金析英英叔季洵皆軼類而超羣濟濟蘭蓀盡堪樸斲而丹雘公則履豐享之盛貴以彌溫當耆耄之齡老而逾恪二難欣晝錦之旋七袞獻引年之爵展祠墓而悽愴撫桑梓而酬酢念宗系譜圖之散佚將哀輯彙纂之浩博偶得微疴謂宜

勿藥何期仙馬遠驂鸞鶴熙曩從九闕早識嗣君
近守三鄣得瞻矩矱雖越一水之迢遞時望高山
之峩峩昨因學宮非一木之支得我大賢重千金
之諾解囊倡率弗辭繁重之功撰日鳩工復興風
教之鐸是故得於覩記之頃竊歎為至性之肫肫
即徧觀乎載籍之林亦鮮此高風之嶽嶽何梁木
之傾摧詎昊天之渺邈風淒淒而入幃霧靄靄而
襲幙鶻啼而血染千山猿嘯而聲哀萬壑望雲山
兮千疊仰神遊於冥漠有蔬載蹇有酤載酌遙致
蕪詞庶幾來格嗚呼尚

饗

維

康熙五十五年歲次丙申孟夏宜祭之辰陝西延
安府知府加五級孫川榆林同知今陞江南淮安
府知府趙之屏靖邊同知加一級胡昌期鄜州知
州加一級張雲鶴綏德州知州加一級劉文煥葭
州知州加一級姚孔鎭膚施縣知縣陳文炳原任
安塞縣知縣今候補朱雷行取甘泉縣知縣制姜
朝勲清澗縣知縣加一級章永祚延長縣知縣加
一級周兆鳳前任延川縣知縣今任江南淮安府
贛榆縣知縣單疇書洛川縣知縣加一級向北麟
宜君縣知縣李良模原任米脂縣知縣加一級制

王珙神木縣知縣加一級賀有章等謹以瓣香束帛致祭於

皇清誥封光祿大夫內閣中書加十二級景翁項老寅伯之靈而言曰嗚呼東傾天柱西隕星芒地維折軸廣廈頽梁斯人淪喪日月焱光長江波逝萬古夜長宜童叟之下泣幾春杵之不相遯公自出分祚周疆歛南移隱土著於唐九傳登第頡武紫陽縣縣科甲世及曾王贈公艱嗣晚育珪璋生而穎異溫潤端方出就外傳一目十行文章品詣金薤琳瑯親師取友負笈錢塘南州共學奪幟文場作五經之鼓吹奏六藝之笙簧性生純孝敦篤彝常

溫清定省燕室矜莊功名可待菽水莫將抱書而歎以士而商通齟裕國輸轉淮揚舍生存之雞藿雖三牲五鼎之奚償况山寇竊發堂上驚惶千里迎養二豎為殃衣不解帶湯藥親嘗年踰大耋樹靜風狂擗踊滅性哀毀終喪歸營葬域陟降夢鄉非精誠之感召胡神之示我周行是以聲譽競起冠蓋紛翔朝紳側席國事匡勦明而能斷柔以為剛胸無城府口無雌黃昂藏器宇冰雪肝腸有道恨相見之晚臺司倚總挈之綱兼修宗祀肯構肯堂築堤捍水廟貌輝煌遠求遺像載見羹牆滌溪樸築德聚流芳子孫肄業擇彼秀良時其婚嫁備

其饑荒立其紀嗣鋤其豪強教忠教孝義田義倉
自處惟儉與人傾囊連生魯國而難排紛解仲施
三黨而惠普恩洋聲聞

帝座拜舞道旁榮分克食兼賁

天章

九重恩渥四海名彰盛德獲福秀啓元方才儕潘陸文
擬班揚遇同李杜偏駕三唐黃扉趨事雞舌含香
仲君分郡清比澄江幸叨共濟借筋弗遑有利待
舉有過胥匡兵民和協僚友趨躋叔季豹隱器卜
廟廊孫蘭繞膝壻坦東牀寶謝家之玉樹擅王氏
之青箱非一人之燕翼胡繼緒之其皇膺茲第祿

期頤未央何庚子亡誼辰巳悲康天高莫極地遠
莫量哲人其萎文獻云亡音容莫溯涕泗其滂然
至人不死正氣莫戕或往車須之國或登極樂之
航或作玉樓之賦或爲修文之郎或芙蓉城畔驂
蚪馭鶴而徜徉固將瞬息乎天地而齊修短乎彭
殤尚

饗

維

康熙五十五年歲次丙申四月庚寅朔越祭日浙
江金華府知府加一級年家眷晚弟制徐德倬全
弟制期綿制德秩率男姪期傳軫制傳庭期傳俊
等謹以剛鬣柔毛之儀致祭於

皇清誥封光祿大夫景翁項太老先生之靈曰嗚呼余
家不造詰人是恃如何昊天殲我吉士識達之深
分過友生項君實是猗歟項君流裔姬昌年少遊
學強記多識發言可詠下筆有章試輒高等名冠
詞場宏才豐藝何道不洽何用不臧為尋甘脆羈
旅徜徉運籌蹉務目睇毫末心無遺策英敏任事

意氣超驥嗣遙望

幸營治行幄君來相度經緯陰陽宮室館舍五柞長楊
庖廚悉備百度畢張急公之費捐貲首倡特蒙
召對存問優渥龍騰鳳翥拱璧熒煌八珍殊膳

錫自上方

恩榮曠典疊沛莫當君之未顯我先司寇道過維揚稠
人一見即加推獎命先君子深相結契長吟把酒
研席連牀情同休戚久而彌芳自今追昔歷歷不
忘嗚呼痛哉去年承乏迎先君子就養婺州言歸
未久旋登玉樓遠承弔賻孤弱是調天道福善宜
永其祿何期倒日魯陽難留朝而豪俊夕已蜉蝣

贈終誅德悲不成篇然而懿行彰彰目前惟是燕
詒世無其偶重購奇書家藏二酉花下亭邊嘯咏
論文座有良師門通益友奕奕嗣君珪組翩翩仕
籍通名王宮新禎熊軾蘭臺取印如斗得邀

覃恩寵贈官階泉壤增光世德丕宣榮膺華綬自君發
祥承先啓後嗚呼哀哉平山峩峩江水湯湯誰料
暖谷忽焉飛霜風披春樹月浸寒塘觸山之力難
可與爭握管周復想見其人紙勞於手涕沾於巾
神遊清沼靈止山隈歸鳥頡頏行雲徘徊項君已
矣長與世違哀慟余懷魂兮莫招梁木實摧嗚呼
哀哉尚

饗

維

康熙五十五年歲次丙申孟夏月庚寅朔越宜祭
之辰年家眷弟駐防江南京口防禦兼理河務加
四級張景仲偕弟江南江寧府管糧監允同知加
一級景偉率男兩淮都轉運鹽使司淮安分司涵
謹以剛鬣柔毛清酌庶饗之儀致祭於

皇清誥封光祿大夫內閣中書加十二級景翁項太翁
之靈曰嗚呼存歿之感倍深於一代之完人名德
之隆遂著有千秋之大義東南耆舊早樹望於寰
中朝野儀型何倏遊於天際維吾太翁允為當代
間氣方之西漢金張有此家風若在南朝王謝乃

兼門第鳴珂或履清華接踵於

聖朝說禮敦詩文采承休於屢世太翁幼即寧馨生而
穎異英年頭角群預卜其崢嶸早歲詞章更爭傳
夫綺麗方其橫經於武林湖上多結心知迨夫奪
幟於臯比堂中獨邀神契繼念垂白之嚴慈終鮮
承歡之兄弟孝子有愛日之誠儒者急治生之計
爰辭歛南小溪僑寓邗江近地官山府海管夷吾
馴致富強握算持籌范少伯老資生事鹺政為理
財之首國計攸關程課以得人為先軍儲實係太
翁則洞悉機宜深明利弊建白綽有鴻才採擇群
諮博議庶使言歡折節先後共資股肱之賢貂珥

投紵締交遠近爭識廟廊之器循循爾雅不尚華
靡抑抑小心每甘恬退板輿迎養花前綵戲娛親
甘毳承顏膝下盤盂養志持家既儉節成風律已
更仁心為質弟昆誼篤友愛不渝於死生姻族情
真急難竟忘其畏避既調子姓更於親知多推解
之施爰葺先塋惟是水木重本原之地遠師先哲
延惠澤於家塾義田載荷深恩示優容於奚僮爨
婢綜生平之大節碩人負有盛名留餘蔭於後昆
令子聯登膺仕長公清華妙選趨承掌禁闈絲綸
次公巖郡分符登陟歷監司名位太翁沐

主眷獨隆

馳封壘沛

紫誥飛來於北闕秩躋崇階

翠華臨莅於南江親承

名對家國之理既通後先之美相濟斯即登之史策永
千載以彌光亦且享以期頤宜五福之具備夫何
修文有名太翁乃一旦騎箕頃以聞訃愴懷予寔
幾為隕涕迴憶先將軍秉鉞京江即心切夫太翁
之碩望會統六師征發致虛蘭譜締交繼予躬承
謦欬獲親模範訓行款曲時蒙投轄方欣永奉典
型胡然仙逝人琴已矣欲飄丹旆以招魂爰託蕪
詞而將意翁靈如在庶幾侑享以式臨大雅云亡

不禁憂思其難既嗚呼尚

饗

維

康熙五十五年歲次丙申四月庚寅朔越祭日宜

祭之辰年家眷弟楊揆率男晚生 賜狀元及弟

協守廣西副總兵謙已丑科進士武英殿協同編

修凱謹以辦香束帛清酌庶饗之儀致祭於

皇清誥封光祿大夫內閣中書加十二級太封翁景翁

項老年臺老先生之靈而言曰嗚呼翁何厭棄人

世而歸天界之速也前翁而生者無翁之仁義後

翁而生者無翁之豪俠翁真千古一人哉翁為新

安望族家世簪纓及其鸞遷廣陵也功德施於人

名聲昭於時肅清齷政剔弊釐奸而諸當事羣推

各車實錄卷四
三
為師資具以其鴻猷偉績上達

宸聰屢叨寵渥鄉之稱美不衰翁有玉樹四株皆調鼎之才翁訓以義方皆登仕籍名走天下長公官內翰人皆以公輔期之次公分守延安旋沐

聖恩遷擢行將有不次之陞也其叔季則俱清華重望
蟬聯而名登

天府翁之食報將極人世所莫加而其樂善好施也嘖嘖人口書之史策造舟以拯溺者而活人無算捐賑以恤饑者而作福靡涯鄉黨親族間貧而不能婚嫁者賴翁賙全之疾痛無告顛連困憊者翁存活之其餘一切殮葬之莫措者翁無不濟人之急

若道院若精藍頽廢莫能修葺者翁皆樂為之倡凡公事之艱鉅人不能任者翁獨力肩之其盛德大業非筆墨所能殫述然余與舍弟締交於翁者最久兒姪輩居常侍教於翁今皆叨

聖天子之榮恩或遠鎮粵西或纂修珥筆皆不能隨余手持辦香一拜靈前大是憾事嗚呼翁今往矣而行誼卓卓人寰著而不滅將與日月爭光也哉自今以往玉樹齊輝芝蘭並茂翁凭玉樓而怡然於九京矣酌酒一卮伏惟尚

饗

維

康熙五十五年歲次丙申夏四月庚寅朔越四日
宜祀之辰榮祿大夫鎮守江南徽州等處地方都
督同知管叅府事加一級年家眷弟戴良弼謹以
剛鬣柔毛清酌庶饘之儀致祭於

皇清誥封光祿大夫內閣中書加十二級景翁項太老
先生之靈曰嗚呼乾坤之毓異子必挺生夫俊傑
福澤之繇長兮知濟美於冠裳惟我太翁誕由嶽
降慧自性生過目默識何須咕嗶之勞舉筆立揮
屢冠英賢之首功名心冷思壯遊而客維揚孝養
情殷挾齧策而謀甘旨終喪擗踊淚溢邗江扶柩

歸營夢來吉穴修歷世之先塋
檟題有赫覓失蹤之族墓碑圖
重光建堤以障河流鳩工而復祠
制竭十年之心力成百世之宗基
至於視外親若內族婚葬咸皆力
任因無嗣而續後祭祀得以長綿
排難解紛皆由介直扶危濟困俱
屬慈祥置義田以賙貧乏資膏火
以勵孤寒憫外家之孱弱復寢地
以妥幽魂覩族堤之圯壞增修築
而遏水患郡學為育材之地倡捐
以告成功族譜值散漫之秋彙輯
而垂不朽

丹陛陳情貸 內帑緩帶征

特恩屢沛

天顏色喜頌

御書 賜克食曠典竒逢五花煥彩
叨四世之

恩封屢代邀榮看滿牀之牙笏備
茲盛德宜享遐齡夫何昊天不弔
遽傳青鳥之音哲人云亡頓返蒼
麟之駕矜式無從儀型不再興言
及此能不悲哉弟謬任名邦得親
仁里喜登龍之有日快御李之多
緣忽聞訃報驚悼非常思靈帳之
空懸憶音容而莫覲呼籲無由悲
愴難已敬陳不腆聊代生芻靈其
不昧來格來歆尚

饗

祭輓彙錄卷四



